

## Կ Ա Ր Ծ Ի Ք

Արման Ալեքսանդրի Ավետյանի ««Խելացի քաղաք» հայեցակարգը և XXI դարի քաղաքային տնտեսության կառավարման ռազմավարության հիմնախնդիրները (Երևան քաղաքի նյութերով)» թեմայով ատենախոսության սեղմագրի վերաբերյալ ներկայացված Ը.00.02 - «Տնտեսության, նրա ոլորտների տնտեսագիտություն և կառավարում» մասնագիտությամբ տնտեսագիտության թեկնածուի գիտական աստիճանի հայցման համար

### **Թեմայի արդիականությունը**

Ա.Ա.Ավետյանի աշխատությունը նվիրված է Երևան քաղաքի համայնքային տնտեսության կառավարման ռազմավարության հիմնախնդիրներին և դրանցից որոշների լուծմանը:

Ժամանակակից աշխարհում գնալով արագանում են ուրբանիզացման տեմպերը, որը քաղաքների դերի բարձրացման հետ մեկտեղ առաջացնում է նաև նոր հիմնախնդիրներ:

Քաղաքային բնակչության պահանջմունքներն այնպիսի արագությամբ են փոփոխվում, որ շատ հաճախ քաղաքը չի կարողանում պատշաճ կերպով և ժամանակին արձագանքել դրանց: Այս առումով առաջ են մղվում քաղաքային տնտեսության բարեփոխման հարցերը, որոնց լուծումն այսօր անհնար է պատկերացնել առանց ժամանակակից տեխնոլոգիաների:

«Խելացի քաղաք» հայեցակարգն առաջարկում է քաղաքային տնտեսության կառավարման հիմնախնդիրների լուծման ժամանակակից մոտեցումներ՝ հիմնված ժամանակակից տեխնոլոգիաների լայն կիրառության վրա: Ընդգրկելով քաղաքային տնտեսության գրեթե բոլոր ուղղությունները և ոլորտները (ֆինանսներ, ենթակառուցվածքներ, բնակչության սպասարկում և այլն)՝ այն վերափոխում է քաղաքն ու դրա ներսում ընթացող քառսային գործընթացները: Այս ամենից հայեցակարգը ձևավորում է բազմաչափ մոդել, որտեղ յուրաքանչյուր տարր դինամիկ զարգանում է՝ հաշվի առնելով մարդկանց օրեցօր փոփոխվող պահանջները:

Ժամանակակից պայմաններում քաղաքային տնտեսության զարգացման ռազմավարության մշակման ու անհրաժեշտությունն էլ պայմանավորում է տվյալ հետազոտության արդիականությունը:

### **Ատենախոսության սեղմագրի հիմնական բովանդակությունը**

Ատենախոսության սեղմագրում ձևակերպվել են աշխատանքի թեմայի արդիականությունը, նպատակը և խնդիրները, առարկան և օբյեկտը, տեսական, մեթոդաբանական և տեղեկատվական հիմքերը, ինչպես նաև գիտական նորույթները և հետազոտության գործնական նշանակությունը:

## Ատենախոսության հիմնական գիտական նորույթը.

Ատենախոսության գիտական նորույթ հանդիսացող հիմնական արդյունքներն են՝

1. Առաջարկվել է Երևան քաղաքի հանրակրթական և առողջապահական օբյեկտների տեղակայման օպտիմալացման մաթեմատիկական մոդել, որը թույլ կտա հավասարաչափ բաշխել նշված հաստատությունները ամբողջ քաղաքով:
2. Ներկայացվել է Երևան քաղաքի տրանսպորտային ենթակառուցվածքների համակարգային զարգացման նոր մոդելը, համաձայն որի՝ փոխվում է շարժման տարածական և ժամանակային փիլիսոփայությունը, և քաղաքի ստեղծվող նոր ենթակառուցվածքային ենթահամակարգերը թույլ կտան օպտիմալացնել մարդու տրամադրության տակ գտնվող ռեսուրսները (ժամանակ, ֆինանսներ և այլն), ինչպես նաև կրճատել վնասակար արտանետումների ծավալը:
3. Մշակվել է Երևան քաղաքի կոշտ կենցաղային թափոնների հավաքման և տեղափոխման գործընթացի օպտիմալացման մոդել, որը թույլ կտա 1 տոննա աղբի հավաքման ու տեղափոխման ծախսերը հասցնել նվազագույնի:
4. Առաջարկվել է Երևանի քաղաքապետարանի կազմակերպական կառուցվածքի կատարելագործման մոտեցում, այն է՝ ստեղծել քաղաքի կառավարման ինտեգրված կենտրոն, որը՝ որպես թվային ուղեղային կենտրոն, հաշվի առնելով գործող օրենսդրական և նորմատիվ իրավական ակտերի պահանջները, լիարժեք տեղեկատվության հավաքագրման, վերլուծության և գնահատման հիման վրա կառաջարկի քաղաքային տնտեսության կողմից մատուցվող ծառայությունների ոլորտներում համապատասխան որոշումների ընդունման օպտիմալ տարբերակներ:

Սեղմագրում կրճատ և ամփոփ ներկայացված է ատենախոսության բովանդակությունը: «*Խելացի քաղաք*» հայեցակարգի էությունը և քաղաքային տնտեսության կառավարման ռազմավարության մեթոդաբանական հիմունքները ժամանակակից պայմաններում» գլխում քննարկվել են քաղաքային տնտեսության կառավարման ռազմավարության տեսական և գիտական հիմքերն ու առանձնահատկությունները, նկարագրվում է «Խելացի քաղաք» հայեցակարգի էությունը, ինչպես նաև ներկայացված է «Խելացի քաղաք» հայեցակարգի կիրառման համաշխարհային փորձը:

Ատենախոսության երկրորդ՝ «*Երևան քաղաքի քաղաքային տնտեսության վիճակի վերլուծությունը և դրա զարգացման հայեցակարգային հիմնախնդիրները*» գլխում քննարկվել են Երևանի քաղաքային տնտեսության տեղն ու դերը ՀՀ տնտեսությունում, առանձնացվել են քաղաքապետարանի բյուջեի կառուցվածքի առանձնահատկությունները, վերլուծվում է Երևան քաղաքի զարգացման ռազմավարությունը (2019-2023թ.թ.) և ՀՀ-ում համայնքային տնտեսության կառավարման օրենսդրական ու կազմակերպական հիմքերը:

Ատենախոսության երրորդ՝ «*Երևանի քաղաքային տնտեսության կառավարման կադարելագործման հիմնական ռազմավարական ուղղությունները*

ժամանակակից պայմաններում» գլխում առանձնացվել են հանրակրթական և առողջապահական օբյեկտների բաշխման օպտիմալացման հարցերը, ներկայացվել է Երևան քաղաքի տրանսպորտային օպտիմալ համակարգի ստեղծման խնդիրները, Երևան քաղաքում շրջակա միջավայրի պահպանության համակարգի կատարելագործման հարցերը և առաջարկվել են դիտարկված ուղղություններով լուծման մոդելներ:

### **Եզրակացություն**

Ա.Ա. Ավետյանի ատենախոսության սեղմագիրը գրված է գիտական պատշաճ մակարդակով, հեղինակի տեսական ու գործնական հետազոտությունները համարվում են արդիական: Սեղմագրում ներկայացվում են բազմաթիվ վիճակագրական տվյալներ և գործնական նշանակություն ունեցող առաջարկություններ ու եզրակացություններ: Աշխատանքի ներածական մասում հեղինակի կողմից առաջադրված նպատակներն ու խնդիրները համապատասխան լուծում են ստացել:

Ատենախոսության սեղմագիրն իր բովանդակությամբ համապատասխանում է ԲՈԿ-ի կողմից ներկայացվող պահանջներին և, դատելով դրանից, կարելի է եզրակացնել, որ Արման Ալեքսանդրի Ավետյանի ««Խելացի քաղաք» հայեցակարգը և XXI դարի քաղաքային տնտեսության կառավարման ռազմավարության հիմնախնդիրները (Երևան քաղաքի նյութերով)» թեմայով ատենախոսությունն իրենից ներկայացնում է ինքնուրույն և ավարտուն հետազոտություն, իսկ դրա հեղինակն արժանի է Ը.00.02 – «Տնտեսության, նրա ոլորտների տնտեսագիտություն և կառավարում» մասնագիտությամբ տնտեսագիտության թեկնածուի գիտական աստիճանի շնորհմանը:

Հայաստանի Ազգային Ագրարային  
Համալսարանի Հեռակա ուսուցման  
դեպարտամենտի պետ,  
տ.գ.թ., դոցենտ

Շ. Ս. Հարությունյան

Ստորագրությունը հաստատում եմ՝  
Հայաստանի Ազգային Ագրարային  
Համալսարանի գիտ. քարտուղար,  
գ.գ.թ., դոցենտ

Գ. Ա. Ավագյան

30 նոյեմբերի, 2021 թ.

